



UKA2018/151

24/10-2018

Randi Vestergaard Evaldsen

**Sisimiut Kangerlussuullu akornanni aqqusinermik qimuttuitsulluunniit aqquataannik pilersitsisoqassagualuarpat inuussutissarsiornikkut periarfissat suut pilersinneqarsinnaanersut pillugit apeqquteqaat aallaavigalugu oqallisissiaq.**

(Inatsisartuni ilaasortaq Peter Olsen, Inuit Ataqtigiit)

Sisimiuni inunngorpunga peroriartorlungalu aamma pinngortitarsuaq nuannersoq atornikuuara. Siunnersuuteqartup Sisimiuniit Kangerlussuarmut aqqusinniortoqartuuppat inuutissarsiornikkut periarfissanik ineriartortitsinnaaneq pillugu saqqummiussinermi sumiiffik kusanaqisumik oqariartuutigivaa aamma.

Sumiiffimik ineriartortinneqassappat periarfissat amerlasuut ilisimavakka nalunagillu, taakkorpiaallu ilaatigut peqquataallutik takornariartitsisarnerup iluani ilinniarnikuuvunga, takunikuugakkit pinngortitarsuarmi periarfissat suusinnaanersut.

Tamatuma saniatigut peroriartorninni nunap immikkoortuani najugaqartut inuit ilisimalluarpakka. Nalunngilara qanoq piumassuseqartigisut qanorlu nukittutigisut. Nalunngilara pingaartitaat piumassusaat illoqarfimmut qanoq pingaaruteqartigisut. Inuit nammineerusuttuupput, sapinngillat aamma qilersorsimannngitsuupput suliassap ineriartortitsinerullu ingerlannissaanut. Inuit pisortat allalluunniit iliuseqarnissaannut utaqqiinnartuunngillat. Aamma tamanna takuneqarsinnaavoq najukkami innuttaasut, kommunalbestyrelsip, najukkami GE-p aamma allat attuumassuteqartut najukkaminnilu ineriartortitsiserusuttut suleqtigiinnerinni.

Uani siunnersuummi suliarisatsinni pineqarpoq inuutissarsiornikkut periarfissanik pilersitsiniarnissaq. Arlaannarpulluunniit tassunga akerliusinnaangunngilaq, inuiaqatigiimmi uagut ineriartornissatsinnut pingaartorujussuuvoq sumiiffinni tamani ineriartornissamut periarfissaqarnissaq.

Oqallinnerulli pissanganartortaa ersertarpoq eqqartuleraangatsigu qanoq tigussaasumik iliussanerluta. Politikkikkut partiit ilaat akulerukkusuttaqaat aqunniarsarilertarlugillu inuutissarsiortut qanoq iliornissaat - tassaavorlu politikkikkut assigiinngissutsitta ilisarnaataa. Uagut Demokraatiniit upperaarpud tatigalugulu unammilleqatigiinnerup aqqani pilersinneqarsinnaasut. Upperaarpud inuutissarsiorneq ineriartorsinnaasoq siuariartorlunilu, pisortat sapinngisamik minnerpaamik akulerusimatillugit. Namminersorlutik inuutissarsiortut kiffaanngissuseqartariaqarput ineriartornissaminnut siuariartornissaminnullu. Uagut politikerit suliassarput tassatuaavoq sinaakkutinik eqqortunik pilersitsinissarpud inatsisiliornissarpullu. Sunnguamilluunniit inuutissarsiortut aporfilersorniarsarissanngilagut aalajangerlugulu sussenersut sussannginnerulluunniit.



Takorloorutsiguli aqqusinniortoqareersimasoq, ukiorpassuarni tamanna eqqartorneqarnikuvoq susoqaranili, nunap immikkoortuani periarfissaqarpoq naassaannigigajattunik. Nunap immikkoortuani pinngortitaq kusanartuuvoq takoranneqalunilu, tamannalu takorluuisinnaanerup angusinnaanngilaaluunniit. Takornariartitsinermi periarfissarpassuaqarpoq aammali inuutissarsiutit allat aqqusineq iluaqutissarsivigisinnaavaat kusanartumillu ineriartorlutik. Nunap immikkoortuani tamaani sutigut tamatigut sakkortuumik timersorneq ineriartortinneqarsinnaavoq. Arpaneq, sisoraatnik arpaneq, sangusaarneq, nuannariinnarlugu aalisarneq, tammaviuttussarsiorluni piniarneq allarpassuillu. Periarfissarpassuaqarpoq.

Pivusorsiortariaqarpugut. Aqqusinniorneq akeqarpoq aamma aserfallattaalinissaa akeqassaaq. Aqqusinniornissamut periarfissarpassuaqarpoq. Sioqqanik qalligaasava, asfalterungaassava imaluunniit qimutsuitsut aqqaatanik sanassaagut siunnersuuteqartup eqqaasaatut. Periarfissarpassuaqarpoq, taamaattumik pingaaruteqarpoq atortussanik sanasoqarnissaa, nassuiarlugit periarfissat assigiinngitsut minnerunngitsumillu periarfissat qanoq akeqassanersut. Allatut oqaatigalugu aalajangiinissatsinnut pitsaasunik tunngavissaqartariaqarpugut, isummersorfigisinnaasatsinnik.

Taakkuupput oqallinnermut Demokraatiniit maannakkuugallartoq ilanngukkusutagut oqalilluarnissassinillu kissaallusi.